

欽定大清會典事例

卷六百二十一

兵部

綠營處分例

欽定大清會典事例卷六百二十一

兵部

綠營處分例

漕運

漕運。○原定江南江西浙江湖廣糧多路遠。運官限內抵通全完者。一運加銜一等。二運加銜二等。三運議敘即升。不復加銜。至三運後。仍按運數加銜。山東河南糧少路近。運官限內抵通全完者。一運紀錄二次。二運加銜一等。三運紀錄二次。四運加銜一等。五運紀錄二次。六運議敘即升。不復加銜。至六運後。仍按運數相間紀

錄加銜。其重運效力武舉。係領運江南。江西。浙江。湖廣。遠省者。每運全完。於補官日記錄二次。領運山東。河南。近省者。每運全完。於補官日記錄一次。三運既滿。咨部註冊推用。○又定。運官已經升任。遇前任內有應議敘即升者。於新任內加銜一等。○又定。各省漕糧。江北各幫。限十月內。過淮。江甯。蘇州。常州。鎮江。及廬州幫。限正月內。過淮。江西。浙江。湖北。湖南。限二月內。過淮。山東。河南。限正月內。全數開行。其過淮各幫。如違限十日者。運官捆打二十。仍令督運。違限

一月者。捆打四十。革職戴罪督運。如現在議處之時。戶部咨到糧已全完者。准免議處。○又定。過淮違限革職戴罪督運之員。於完糧後。由總漕題請開復。○又定。各省漕糧。山東。河南。限三月初一日抵通。江北。限四月初一日抵通。江南。限五月初一日抵通。江西。浙江。湖北。湖南。限六月初一日抵通。均於三月內完糧。限內完糧者。准其議敘。若山東。河南。江北。完糧在三月之外。江南。江西。浙江。湖北。湖南。完糧逾九月初十日者。均以違限題叅。違限不及一月者。罰俸三月。

一月以上者。罰俸六月。二月以上者。罰俸一年。

三月以上者。降一級留任。內有因過淮違限已

經議處者。將抵通完糧各日期扣除。免其議處。

過淮違限十日將抵通完糧違限十日扣除凡日期多寡均照此算領運白糧官

亦照此例。又定漕船抵通運官以通幫之糧

計算。如有挂欠不及一分者。責二十革職。發南

限一年追完。免罪復職。不完革職。挂欠一分者

責三十挂欠二分者責四十挂欠三分者責六

十皆革職。各按挂欠分數發南限一年追完免

議不完交刑部治罪。挂欠四分者責四十挂欠

五分者責一百。皆革職。各按挂欠分數發南限一年追完。仍聽刑部議結。挂欠六分以上者。即交刑部治罪。旗丁管駕一船。即以一船之糧計算。如有挂欠。各按其分數發南限一年追完。不完交刑部治罪。又定。運官挂欠漕糧發南追比者。戶部倉場咨到之日。即行開缺。限內全完。題請開復。赴部候補。又定。運官領運漕糧。剋削旗丁。或將應給錢糧侵扣不發。或將月糧修船等銀自行領出收存。抑勒不發。或因需索不遂。酷責旗丁者。皆革職究擬。又定。奉

旨差遣及赴任各官。均有定限。漕船應讓路放行。其買賣並一應行船。均令照常行走。如漕船立纛豎旗。鼓吹張號。強橫武斷。運官不行查禁者。罰俸一年。○又定。漕船到汛。不速催趲。無故容令先後越幫者。專汛官罰俸九月。兼轄官罰俸六月。其漕船入境日期。不查明轉報者。專汛官罰俸六月。若前汛催趲不力。致礙次船。後汛之員申報倉場。將前汛之員查叅議處。至不親赴水次催趲。並坐視前船阻塞不行申報者。亦照催趲不力例議處。○又定。漕船出運。以十年為滿

號該管守備先期請領料價成造。儻有遲延致誤冬兌冬開者。革職。如捏報成造。或釘稀板薄。不合式者。降二級調用。仍將料價著落賠補。至奉委成造。託故推諉。並日久不告竣者。皆降一級調用。○又定。漕船在大江黃河洪澤湖遭風漂沒。勘實題明。准予豁免。運官免議。其在內河失風及冰凌擦漏沈溺。運官失於防範者。罰俸一年。若遇汎水漲發。猝不及防。失事之船。果能戽救修艤。抵通全完。並無虧折。運官免議。仍照完糧例議敘。沿途催趲之汎官。亦免議處。儻船

非滿號米有挂欠。雖買補全完。仍照例議處。沿途催趲之汛官。不能協同護救。以致漂沒者。照失於防範例。罰俸一年。○又定。漕船遭風漂沒。沿途催趲之汛官。不即申報者。罰俸一年。不親臨確勘。遽出保結者。革職。○康熙三年題准。運官領兌漕糧。抗不赴次。及赴次恣意勒索淋尖。倚勢毆打。或不約束旗丁。致令爭索斛面酒席。恥辱糧官。或沿途生事騷擾。阻壓行船。不許前進。恃強毆官。鬪斃民命。運官縱容坐視。及隨幫領押回空。任意停泊。兵役前往催趲。抗不遵依。

轉縱旗丁毆打者。皆革職究擬。沿途專汛官不查拏者。降二級調用。若已抵天津通州。責成天津總兵通州副將稽察防範。如不行查拏。副將降二級調用。總兵降一級留任。如沿途專汛官及副將能查拏申報者。概免議處。已經申報而該管之各鎮不查叅者。降一級調用。○又題准運官緣事應革職審擬。其未經起程者。該督撫即行審擬。別僉領運。已經起程者。除命盜等項重情。即革職審擬。至尋常一切註誤。俟交糧完日。押令回省審結。○又題准漕船所過地方。有

汎兵需索銀錢者。該管官照失察衙役犯贓例議處。汎官需索者。將該管上司照不揭報劣員例議處。需索之人。皆計贓以枉法論。如止收受土儀禮物。係官罰俸九月。兵丁笞四十。若汎官汎兵需索。或旗丁行賄。運官不申報者。照應申不申例議處。知情故縱者。照以財行求律。與旗丁一併治罪。○又題准。官員已僉領運。若抗違規避。誤漕者。革職。○又題准。運官擅准呈詞。拘繫新僉領運之人。以致誤漕者。照誤漕例議處。○又題准。運官攬載客貨及私載己貨者。革職。

若旗丁於應載土宜之外攬載客貨私載已貨。運官失於覺察者降一級調用。○又議准衛官捏告運官侵糧希圖奪運以致誤漕者革職。○又議准運官並非因公羈絆以私事逗遛不親押運至糧船抵通起卸之後始行趕至者皆革職。其因公羈絆於糧船抵通起卸後始行趕到者罰俸六月。至領運北上運竣南旋託故回籍者革職。○二十一年題准抵通漕糧有糠粃砂土者領運官革職如無糠粃砂土收糧官抑勒不收者降二級調用。○二十六年題准運官巡

察不勤以致失火燒毀漕船者降一級調用該
管專汛官不實力撲救以致延燒別船者罰俸
一年○二十七年題准運官需索旗丁不遂不
顧風浪逼渡江湖以致漂沒糧米淹斃人口者
追埋葬銀給死者之家漂沒糧米著落賠補○
二十八年題准運官縱容旗丁捉船剝淺漫無
約束者照例議處○二十九年題准運官領運
漕糧停泊演戲逍遙任催不理或陵辱牘官強
開牘板洩水以致誤漕者革職究擬至不按程
前進沿途脫幫遲誤者降二級戴罪督運若催

趲不力。捏報水淺塘塞者。罰俸六月。○又題准。衛所官解送撥船遲誤。或以朽壞之船應數者。罰俸一年。○又題准。運官領運白糧。私行與人者。革職提問。○四十六年題准。各省旗丁限內過淮抵通全完者。總漕賞給花紅。如抵通交糧於額數之外。有管運三年陸續多交百石者。倉場咨部註冊。管運六年於額數之外。陸續多交二百石者。以及管運二十年。雖交糧無多。而並無挂欠事故者。均由倉場覈實咨部。給以九品頂戴榮身。○又議准。給有頂戴之旗丁。及管運

之捐納貢監生武生有干犯漕規者與旗丁一例懲治。○又議准運官除犯贓失守軍政糾叅及隱匿逃人之罪者不准以完糧議敘抵銷其因公註誤應降級調用者准以現在議敘之加銜一等抵銷降一級已加之銜不准抵銷議敘紀錄者亦准抵罰俸若罪至革職者不准抵銷。○五十年議准漕糧未經兌完捏報兌完漕船未經開行捏報開行者皆降二級調用。○五十年題准衛所官收兌漕糧多攙糠粃砂土及將漕糧私自改折者皆革職。○又議准旗丁須

僉家道殷實之人。由該管千總查實。出具保結。呈報守備等官覆驗加結。如有挂欠。將濫行出結之千總守備。皆降一級調用。○又題准運官抵通無欠。倉場給發限單。令其即回。協同隨幫管押漕船。到淮呈驗限單。如到淮違限者。照規避例革職。○雍正二年覆准。衛所漕船開行。過十二月者。罰俸半年。過正月者。罰俸一年。過二月者。降二級留任。其湖南漕糧。限十一月運至岳倉。如州縣漕糧。旗丁漕船。均到水次。運官收兌遲延。致過十二月者。照過二月開行例議處。

如能依限過淮題請開復。○三年議准漕船夾帶私鹽者運官降三級調用。隨幫褫革如倚恃漕船任意販載不服盤查者運官革職隨幫責四十褫革。若於該管幫船一年之內並無私鹽者紀錄一次。隨幫於補官日紀錄一次。至回空三次並無私鹽者該管官將隨幫出具印結咨部以千總推用。○四年議准漕船失察私帶礮者該管官降一級調用。失察私帶鳥槍者罰俸一年。○又題准領運漕船若遇風色不順水勢浩大該專汛官與運官公同計議暫停守候即